

1047.

1461 Juni 1

Einigung über die Rückzahlung von in ein Bergwerk investiertem Geld.

fol. 197r Actum 2^a feria post trinitatis anno etc. LXprimo bey dem burger(meiste)r Sturm und synen kumppan sint komen vor eynen siczindin rath er Niclaus von Czwigkaw, eyn brudir predigerordins des closters czu Plauwen, und Lorencz Sneider, unsern mitburger, nest an Nickel Nuweman in Unserir Lieben Frauengaszen gesessen und haben irczalt, wy sy eczlich gelt czusampne uff gemeynschafft geleit und daz der genante Lorencz Sneidir undir om gehabt und uff bergwerge òn beiden czu gute gewant hat. Sulche sachin, dy Lorencz Sneidir on beiden czu gute vorgenommen hat, òn umbe geslagen und eyne mergkliche summe geldis, biderwere luthen wol bewust, vorbuwit habin, des brudir Niclaus an synir summe geldis nicht meynt czu entkelden. Also hat Lorencz Sneidir dy gunst und fruntschafft, dy brudir Nicolaus zu òm gehabt hat, angesehin und hat sich in dy schuld, dy er Niclaus czu òm geleit hat, gesaczt, nemlichin in andirhalb hundirt gulden reynisch. Gereth und globit brudir Niclaus addir nach synem tode synen brudirn des closters czu Plauwen bezalung czu thune, czehin gulden uff Michaelis ubir eyn jar nach datum diszir schriffte nest komende anzuheben und dornach alle jar jerlichin uff dy genantin tagzeit czehin gulden bisz solange, daz sulche andirhalb hundirt gulden von Lorencz Sneider, synen erben adder erbnemen bezalt und uszgericht werden. Und ab Lorencz Sneidir addir syne erben des goldis, uff welche tagzeit daz wer, nicht bekommen mochte, sal er vor dy gulden muncz geben uff iczliche tagzeit, also es in den landen czu nemen und czu geben laufftig ist. Des wir Lorencz Sneidir also auch eynen brieffe gegeben haben. Actum die quo supra.

1048.*ohne Datierung****Niclaus Weidner, Pfarrer in Marienthal, quittiert den erhalt von Geld.***

fol. 197r Paul Strodil, Michil Hirsfelder, Heyncz Huch und Thomas Filbir haben bekanth, das sy von er Niclaus Weidner, dem pharrer zu Mergintal gehort haben, daz òn Nickel Sturm czu gutem dangke bezalt hab 8 guldin an golde, dy er òm gelihn und da vor er òm synen brieffe gegeben hat. Den brieffe Nickel Sturm widir gevordit hat, òm den uff dy gethane bezalung wider czu geben, der vor uns gesagit hat, er hab den brieffe vorloren und hat Nickel Sturm der schuld quid, ledig und loszgesagit, und ab den ymant hette und vorlegen wolde, so hat er on craftlosz gesagit.